

Svrha pravila

Pravilo 8 bavi se temeljnim principom igre: „Igraj na igralištu onakvom kakvim ga zatekneš.” Kada se igračeva loptica umiri, on mora prihvatiti postojeće uslove koji utiču na udarac i ne smije ih poboljšavati prije igranja lopticom. Međutim, igrač može opravdano djelovati čak i ako tim djelovanjima poboljšava ove uslove, a ima i nekih ograničenih okolnosti pod kojima se poboljšani ili pogoršani uslovi mogu vratiti u predašnje stanje bez kažnjavanja.

8.1 Djelovanja igrača radi poboljšavanja uslova koji utiču na udarac

Da bi se podržao princip „igray na igralištu onakvom kakvo je”, ovim pravilom se ograničava ono što igrač može činiti radi poboljšavanja bilo kojeg od sljedećih zaštićenih „uslova koji utiču na udarac” (bilo gdje na igralištu ili van njega); da bi izveo sljedeći udarac, igrač će odrediti:

- položaj svoje umirene loptice;
- područje stava koji planira da zauzme;
- područje svog planiranog svinga;
- svoju liniju igranja i
- područje olakšice u kome će lopticu ispuštati ili polagati.

Ovo pravilo se primjenjuje na djelovanja tokom igranja kruga i onda kada je igra zaustavljena po Pravilu 5.7a. Pravilo se ne primjenjuje:

- na uklanjanje neučvršćenih predmeta ili pokretnih zapreka, što je dozvoljeno u mjeri određenoj po Pravilu 15, ili
- na djelovanja dok je igračeva loptica u kretanju, koja su određena Pravilom 11.

8.1a Djelovanja koja nisu dozvoljena

Izuzev na ograničene načine koji su dozvoljeni pravilima 8.1b, c i d, igrač ne smije činiti sljedeće ako tim djelovanjima poboljšava uslove koji utiču na udarac: **1)** pomjerati, savijati ili lomiti:

- rastinje ili pričvršćeni prirodni predmet;
- nepokretnu zapreku, sastavni objekat ili objekat koji označava granicu igrališta, ili
- označivač polazišta namijenjen polazištu kada igra lopticom sa polazišta; **2)** pomjerati neučvršćene predmete ili pokretnu zapreku na drugo mjesto (na

primjer, da bi zauzeo stav ili poboljšao liniju igranja); **3)** mijenjati površinu tla, što obuhvata i sljedeće:

- vraćanje divota u njihove rupe,
- uklanjanje divota ili utiskivanje divota koji su vraćeni na mjesto ili drugih otkinutih dijelova travnjaka koji su već vraćeni na svoje mjesto, ili
- pravljenje ili uklanjanje rupa, udubljenja ili neravnih površina; **4)** uklanjati ili utiskivati pijesak ili rastresitu zemlju; **5)** uklanjati rosu, inje ili vodu.

Kazna za kršenje Pravila 8.1a: opšta kazna.

8.1b Djelovanja koja su dozvoljena

Pripremajući se za izvođenje udarca, igrač može činiti sljedeće, pri čemu nema kažnjavanja čak i ako se tim djelovanjima poboljšavaju uslovi koji utiču na udarac:

1) korektno tražiti svoju lopticu opravdano djelujući da bi je pronašao i identifikovao (pogledajte Pravilo 7.1a); **2)** opravdano djelovati da bi pomjerio neučvršćene predmete (pogledajte Pravilo 15.1) i pokretne zapreke (pogledajte Pravilo 15.2); **3)** opravdano djelovati da bi označio mjesto na kome je loptica i da bi podigao i ponovo položio lopticu po pravilima 14.1 i 14.2; **4)** polagati štap lagano upravo ispred ili upravo iza loptice; *ali, ovim nije dozvoljeno:*

- utiskivanje štapa u zemlju ili,
- kada je loptica u bankeru, dodirivanje pijeska upravo ispred ili upravo iza loptice (pogledajte Pravilo 12.2b[1]); **5)** čvrsto postaviti stopala pri zauzimanju stava, što obuhvata i opravdano ukopavanje stopalima u pijesak ili u rastresitu zemlju; **6)** korektno zauzeti stav opravdanim djelovanjima radi prilaska loptici i zauzimanja stava; *ali, pri tome igrač:*
- nema pravo da u djelovanjima ide do normalnog stava ili swinga i
- mora se opredijeliti za pravac djelovanja kojim vrši najmanje promjene u datoj situaciji; **7)** izvesti udarac ili zamah unazad za udarac koji potom izvodi; *ali, kada je loptica u bankeru, dodirivanje pijeska u bankeru pri zamahivanju unazad nije dozvoljeno po Pravilu 12.2b(1);* **8)** na polazištu:
- postavljati ti u ili na tlo (pogledajte Pravilo 6.2b[2]),
- pomjerati, savijati ili lomiti bilo koje rastinje ili pričvršćeni prirodni predmet (pogledajte Pravilo 6.2b[3]) i
- mijenjati prirodu tla, uklanjati ili utiskivati pijesak i zemlju, ili uklanjati rosu, inje ili vodu (pogledajte Pravilo 6.2b[3]); **9)** u bankeru, poravnavati pijesak brinući za igralište pošto je loptica kojom je odigrano iz bankera izašla iz njega (pogledajte Pravilo 12.2b[3]); **10)** na grinu, uklanjati pijesak i rastresitu zemlju i popravljati oštećenja (pogledajte Pravilo 13.1c); **11)**

pomjerati prirodni objekat da bi se vidjelo da li je neučvršćen; *ali ako se za objekat ustanovi da je rastinje ili da je pričvršćen, on mora ostati pričvršćen i mora se vratiti što je moguće preciznije u prvobitni položaj.*

8.1c Izbjegavanje kažnjavanja ponovnim uspostavljanjem uslova koji su bili poboljšani kršenjem pravila 8.1a(1) ili 8.1a(2)

Ako je igrač poboljšao uslove koji utiču na udarac pomjeranjem, savijanjem ili lomljenjem nekog objekta, kršeći pritom Pravilo 8.1a(1), ili pomjeranjem nekog objekta na drugo mjesto, kršeći Pravilo 8.1a(2):

- ne primjenjuje se kazna ako prije izvođenja sljedećeg udarca igrač otkloni poboljšanje uspostavljajući početne uslove na načine dozvoljene stavkama (1) i (2) u nastavku;
- ali ako igrač poboljšava uslove koji utiču na udarac djelujući na bilo koji od načina opisanih pravilima 8.1a(3)-(5), ne može izbjeći kažnjavanje uspostavljanjem početnih uslova.

1) Kako ponovo uspostaviti uslove koji su bili poboljšani pomjeranjem, savijanjem ili lomljenjem objekta

Prije izvođenja udarca, igrač može izbjeći kažnjavanje zbog kršenja Pravila 8.1a(1) ponovnim postavljanjem prvobitnog objekta što bliže je moguće njegovoj početnoj poziciji tako da je time eliminisano poboljšanje nastalo kršenjem pravila, na primjer:

- vraćanjem objekta koji označava granicu (kao što je granični kočić) koji je pomjeren ili pomjeranjem objekta koji označava granicu nazad u njegov prvobitni položaj pošto je bio gurnut da zauzme drugačiji ugao, ili
- vraćanjem grane drveta ili trave ili nepokretne zapreke u njihov početni položaj pošto su bili pomjereni.

Ali igrač ne može izbjeći kažnjavanje:

- ako poboljšanje nije eliminisano (na primjer, kada su objekat ili grana savijeni ili polomljeni do te mjere da se ne mogu vratiti u početni položaj) ili
- korišćenjem bilo čega drugog različitog od samog prvobitnog objekta u uspostavljanju uslova, na primjer:
 - korišćenjem drugog ili dodatnog objekta (recimo, postavljanjem nekog drugog kočića u rupu iz koje je izvađen granični kočić ili vezivanjem pomjerene grane da bi se vratila na mjesto) ili

- korišćenjem drugih materijala radi popravke prvobitnog objekta (na primjer, korišćenjem trake da bi se popravio polomljeni objekat koji označava granicu ili grana).

2) Kako uspostaviti uslove koji su bili poboljšani pomjeranjem objekta u njegov pravi položaj

Prije izvođenja udarca igrač može izbjeći kažnjavanje za kršenje Pravila 8.1a(2) tako što će vratiti pomjereni objekat u njegov prvobitni položaj.

8.1d Uspostavljanje uslova koji su bili pogoršani pošto se loptica umirila

Ako su uslovi koji utiču na udarac pogoršani pošto se igračeva loptica umirila:

1) Kada je uspostavljanje uslova koji su prethodno pogoršani dozvoljeno

Ako su bilo koja osoba koja nije igrač ili neka životinja ili vještački objekat pogoršali uslove koji utiču na udarac, igrač može, bez kažnjavanja po Pravilu 8.1a:

- uspostaviti uslove što je moguće sličnije početnim uslovima;
- označiti mjesto loptice i podići je, očistiti i ponovo je položiti na njeno pravo mjesto (pogledajte pravila 14.1 i 14.2) ako je opravdano da se to čini radi uspostavljanja početnih uslova ili ako je neki materijal ostao na loptici pri pogoršavanju uslova;
- ako se početni uslovi, pošto su pogoršani, ne mogu lako uspostaviti, podići lopticu i ponovo je položiti postavljajući je na najbliže mjesto (ne bliže rupi) na kojem (1) su uslovi koji utiču na udarac najsličniji početnim, (2) a koje je unutar jedne dužine štapa od početnog mjesta loptice i (3) u istom području igrališta u kome je to početno mjesto.

Izuzetak – Položaj loptice je pogoršan pri njenom podizanju ili poslije toga, a prije nego što je ponovno položena: ovo obuhvata Pravilo 14.2d, sem ukoliko je položaj pogoršan kada je igra zaustavljena, a loptica je bila podignuta, u kom slučaju se primjenjuje ovo pravilo.

2) Ako su uslove koji utiču na udarac pogoršali igrač, prirodni objekat ili prirodne sile, kao što su vjetar ili voda, igrač ne smije poboljšavati ove pogoršane uslove kršeći Pravilo 8.1a (izuzev onako kako to dozvoljavaju pravila 8.1c[1], 8.1c[2] i Pravilo 13.1c).

Kazna za igranje nekorektno zamijenjenom lopticom ili za igranje lopticom sa pogrešnog mjesta kršeći Pravilo 8.1d: opšta kazna po pravilima 6.3b ili 14.7a. Ako usljed pojedinačnog djelovanja ili usljed povezanih djelovanja dođe do višestrukog kršenja pravila, pogledajte Pravilo 1.3c(4). *Pogledajte pravila 22.2 (u igri učetvoro, bilo koji partner može djelovati za stranu i njegovo djelovanje tretira se kao djelovanje igrača) i 23.5 (u igri sa četiri loptice, bilo koji partner može djelovati za stranu i njegovo djelovanje u vezi sa igračevom lopticom ili opremom tretira se kao djelovanje igrača).*

8.2 Namjerna djelovanja igrača radi mijenjanja drugih fizičkih uslova koji utiču na njegovu lopticu u mirovanju ili na udarac koji će biti izveden

8.2a Kada se primjenjuje Pravilo 8.2

Ovo pravilo odnosi se samo na namjerna djelovanja igrača kojima on mijenja druge fizičke uslove koji utiču na njegovu lopticu u mirovanju ili na udarac koji će biti izveden. Ovo pravilo se ne primjenjuje na igračeva djelovanja čiji je cilj:

- namjerno preusmjeravanje ili zaustavljanje njegove loptice ili namjerno mijenjanje bilo kojih fizičkih uslova koji utiču na to gdje bi se loptica mogla umiriti (što je obuhvaćeno pravilima 11.2 i 11.3), ili
- promjena igračevih uslova koji utiču na udarac (na šta se odnosi Pravilo 8.1a).

8.2b Zabranjena djelovanja kojima se mijenjaju drugi fizički uslovi

Igrač ne smije namjerno djelovati na načine navedene u Pravilu 8.1a (**izuzev** onako kako je dozvoljeno Pravilom 8.1b, c ili d) da bi promijenio bilo koje druge fizičke uslove koji utiču na to:

- gdje bi igračeva loptica mogla ići ili gdje bi se mogla umiriti poslije njegovog sljedećeg udarca ili kasnijeg udarca, ili
- gdje bi igračeva loptica u mirovanju mogla ići ili gdje bi se mogla umiriti ako se pomjera prije nego što se izvede udarac (na primjer, ako je loptica na strmoj padini a igrač je zabrinut da bi se mogla otkotrljati u žbun).

Izuzetak – Djelovanja radi njege igrališta: kazna iz ovog pravila ne primjenjuje se ako igrač mijenja bilo koje druge fizičke uslove radi njege igrališta (kao što su izravnavanje otisaka stopala u bankeru ili vraćanje divota u njegovu rupu). **Kazna za kršenje Pravila 8.2:** opšta kazna. *Pogledajte pravila 22.2 (u igri učetvoro, bilo koji partner može djelovati za stranu i njegovo djelovanje tretira se kao djelovanje igrača), 23.5 (u igri sa četiri loptice, bilo koji partner može djelovati za stranu i njegovo djelovanje u vezi sa igračevom lopticom ili opremom tretira se kao djelovanje igrača).*

8.3 Namjerna djelovanja igrača radi mijenjanja fizičkih uslova koji utiču na lopticu u mirovanju drugog igrača ili na udarac za koji se drugi igrač sprema

8.3a Kada se primjenjuje Pravilo 8.3

Ovo pravilo se odnosi samo na namjerna djelovanja igrača kojima on mijenja fizičke uslove koji utiču na lopticu u mirovanju drugog igrača ili na udarac za koji se drugi igrač sprema. Pravilo se ne primjenjuje na igračeva djelovanja kojima se preusmjerava ili zaustavlja loptica u kretanju drugog igrača ili kojima se namjerno mijenjaju bilo koji fizički uslovi koji utiču na to gdje bi se loptica mogla umiriti (što je obuhvaćeno pravilima 11.2 i 11.3).

8.3b Zabranjena djelovanja radi promjene drugih fizičkih uslova

Igrač ne smije namjerno djelovati na načine navedene u Pravilu 8.1a (**izuzev** onako kako je dozvoljeno Pravilom 8.1b, c ili d) da bi:

- poboljšao ili pogoršao uslove koji utiču na udarac drugog igrača ili
- promijenio bilo koje druge fizičke uslove koji utiču na to:
 - gdje bi mogla ići loptica drugog igrača ili gdje bi se mogla umiriti poslije sljedećeg udarca tog igrača ili poslije njegovog kasnijeg udarca, ili
 - gdje bi loptica u mirovanju drugog igrača mogla ići ili gdje bi se mogla umiriti ako se pomjeri prije nego što je udarac izveden.

Izuzetak – Djelovanja radi njege igrališta: kazna iz ovog pravila ne primjenjuje se ako igrač mijenja bilo koje druge fizičke uslove radi njege igrališta (kao što su izravnavanje otisaka stopala u bankeru ili vraćanje divota u njegovu rupu). **Kazna za kršenje Pravila 8.3:** opšta kazna. *Pogledajte pravila 22.2 (u igri učetvoro, bilo koji partner može djelovati za stranu i njegovo djelovanje tretira se kao djelovanje igrača), 23.5 (u igri sa četiri loptice, bilo koji partner može djelovati za stranu i*

njegovo djelovanje u vezi sa igračevom lopticom ili opremom tretira se kao djelovanje igrača).